

贈給禮遂還景福宮○一更巽方有氣如火○辛酉傳于都承
旨李名珪曰翌日宴親自出對例也天使亦必聞知之矣予今
不赴心甚未平爾速往哉其代予言曰寡嗣君以喪中有小疾而
迫乎不得已之勢迎命出入氣又疲憊未果來也惶恐俟罪當
調保而出以致謝於大人如是善辭而告之且今日宴享予雖
未往而諸事一如親宴之時可也此言并言于提調等李名珪
自大平館來復命曰臣以傳教之意既盡告于兩天使前仍以
小臣私意道之曰寡嗣君自初喪過傷氣未得蘇復只為皇朝
厚賜之意不得不親自郊迎而猶以為未洽於情禮今日亦欲
出慰而未果力疾耳上天使曰知道副天使曰承旨此言乃保
護聖躬之意也又曰海東之主一身甚關亦憂國愛民之誠也
名珪仍啓曰臣竊探觀兩使之意則略不以攝行宴禮形諸辭
色傳曰啓意俱知道○弘文館副提學羅淑等啓曰昨日許
多禮貌勞動已極敬謹之至雖不自覺而所傷必多如初二日
賜祭賜賻等大禮雖不可攝行亦當以氣候之安未而權處